

左文襄公年譜

左文襄公年譜卷九

光緒四年戊寅公六十七歲

正月疏言新疆改設行省事關西北全局請

下廷臣及各省督撫會議

上仍命公詳議以聞

書牘卷二十是年與陳俊臣書云新疆十餘年淪於異域弟以衰朽之年謬肩艱鉅餉糧

轉饋不但視內地艱阻百倍即上下數十年有事西征罕見其比痛定思痛誠不料浮圖百尺終有合尖之日也見擬置省設郡縣事屬初始頭緒紛繁地界疆鄰一切布置諸宜詳慎又與王孝鳳書云新疆置省批答仍由一切布置諸宜詳推艱局外異議必多新疆腴區非得此不能駐軍設防以嘉峪關抵哈密巴里坤荒瘠寒苦專恃內地采運費十石不能致一石屯兵日久勢必自潰漠南北將無安枕之日而寢居肩背已寒弟所以屢疏力陳不計成敗利鈍以全力赴之者豈得已哉閣下畱心國故當知所言非妄矣又答朱茗生書云西域改郡縣疏請內外集議非僅慮執咎之難異時議

其後者足害其成也。北路經逆回及安集延蹂躪甚費整理。南入城因安酋視爲屬境尙復完好如初。此次大軍所至秋毫無犯。再加以經理其利自見。始恍然於純廟拓邊節餉遺意而益見停軍不進之非策也。謨謀諸公力贊密勿而後疆圻不復堅持異論得以了此句。當然每念後此時易勢遷又不知何如矣。蓋處數十年後論數百年以前事處數千百里外論數千百里內事其不能有當本在意中而邊塞任事之人能見諒於後世未必盡見許於當時。改弦更張恐不復成。音叶響耳。劉錦棠既定喀什噶爾以次巡歷葉爾羌和闐各城夷番流寓者英吉利乳目國阿刺伯凡十餘人。印度溫都斯坦各國凡五千餘人咸震懾軍威無敢動。書牘卷二十是年復總理衙門書云屢接各將領信均言軍威之壯西域種人實爲震懾甚且謂其能飛向之以槍礮隊稱雄者皆嗒然若喪蓋不明練心練膽之術而但侈器之精技之長陳之整固有時而窮矣。此次天威震盪足令西域聞風膽落惟威宜養而氣不可屢洩連聲之雷不震食鼠之貓不威亦所宜鑒。按西國近事彙編西歷一千八百七十八年五月西報云歐人蓄意俄

土相戰而因東顧亞細亞之事喀什噶爾爲中國克復則彼處確爲中國之一隅中國於亞洲卽爲有權前同人踞雲南大理中國克復之今又恢復回疆投東干回幾盡當初陝甘總督左欽帥募兵於關外屯田外國人方竊笑其迂迺今觀之左欽帥急先軍食謀定而往老成持重之略決非西人所能料一千八百七十六年兵克烏魯木齊分路諸地部署定然後整軍進征疆勁之虜阿古柏帶領大隊兵馬迎敵離喀什城二千七百之遙孤火宵鳴鼓角曉震有氣吞天南之概迺中途墮命後人爭位自亂不復禦侮漢兵自吐魯番庫車進阿克蘇勢如破竹迎刃而解其部伍嚴整運籌不苟如俄人攻基法一般似此行陳足見總統金順之大才其兵亦耐勞苦志堅力果計二十日中經過一千二百里荒野沙漠而得三城一大捷由是葉爾羌和闐各城先後克復一千八百七十七年兵在喀什噶爾過冬中國至喀什噶爾一律肅清可謂神矣其克喀喇沙拉也兵以寡勝其克喀什噶爾也兵以合圍勝使歐人當此其軍律亦不過此平時歐洲人輕料中國謂中國人不能用兵今觀中國之恢復回部更勝於克復雲南大理足令吾歐人一清醒也當時西人之論如此惟編中稱總統金順迺資遣英乳阿刺伯人還國其印度各國人蓋以道遠致謫

願畱者聽其安居故處仍置各城阿奇木伯克什罕伯克等  
同官如舊制其不受法度虐役纏回者公輒隨時劾罷回民  
愈益悅服先是西四城卡倫外布魯特十九部落錯居其喀  
城西北五部落先圉俄羅斯餘十四部落圉安集延至是十  
四部落頭目爭求內圉公許其請而以喀城介蔥嶺支榦之  
中安集延布魯特部居西偏必蹕山迺達喀城爲中外天然  
界畫迺議南自英吉沙爾北至布魯特界按卡倫故址改築  
邊牆擇要隘置碉堡初俄人議交還伊犁駐京公使數以邊  
境商民交涉各案未結爲詞公皆爲平情定讞以報時俄人  
處白彥虎阿爾瑪圖劉錦棠書與俄圖爾齊斯坦總督欲提

兵入境勦捕公曰俄於歸伊犁從無異辭卽以兵臨之勢必決裂而白彥虎聞風徙避更在意中迺請

敕總理衙門與俄使按條約索取復飭金順迄書俄邊官以還伊犁交叛逆兩事併議而許以重犒久之不報已俄人徙白彥虎於托呼瑪克又聲言將逼精河安設卡倫前敵諸軍將皆憤請用兵搜索公以爲俄雖示形作勢未必卽有狡然思啟之心惟貪踞伊犁與庇匿叛逆以要求厚犒而又不肯顯露其意此時兵威已盛欲戰卽戰何所顧忌惟東北西北均與接界兵事將無了期尙宜遜以出之不可衅自我開令彼得有藉口迺飭南北各軍戒嚴而與劉錦棠書曰彼張虛聲我

務實事待其動而後圖之疆場之事一彼一此不可稍存成  
見致滯戎機何可輕啟弊端致撓成算漢文帝與單于書所  
謂漢過不先匈奴而邊境又安曹孟德意思安問如不欲戰  
而每戰輒利似於今爲宜未幾英噉布噶爾部人奪踞俄邊  
達爾瓦斯哈拉替艮兩城俄調邊兵與戰諸將復謂機有可  
乘公復飭之曰俄英構隙已久俄恃其國大英恃其兵彊各  
不相下我且綢繆牖戶靜觀其敝不以彼之彊弱爲意而曰  
夜思所以自彊亦不以彼之言我彊我弱爲意也非惟此時  
待俄英之道宜然古今有道之世其交鄰也亦必如此昌黎  
韓子擬越裳操謂我何意於彼爲蓋得聖人之心者四月劉

典以疾乞歸奏起前浙江巡撫楊昌濬幫辦甘肅新疆善後事宜

許之是時新疆善後諸務畢舉以次裁併征營改防營行餉爲坐

餉

書廣卷二十是年與劉克庵書云新疆肅清關內防營自應裁減坐糧惟遇有出征之事臨時仍照行糧章程發餉

歸伍日止似情順理當可無異言南疆皆腴地見需善後撫卹之費將來設郡縣所費亦可節省所應預籌者內地營額

須漸漸補實總在舊額三分之二庶撤勇免致茫然苦缺州縣須定津貼免其剝民監司道府須定津貼免其蠹國此節

流之說也以言開源之策則新疆銀錢之制稅釐之章茶市之利加以經理正賦外可增數十萬之入內地則祇百貨之

釐牲畜之稅尙可逐漸經理得人任使數年後卽承平經費協餉舊額可期漸減但弟衰邁日甚不能委蛇以俟耳經費

尤鉅復請息借商銀三百五十萬兩白彥虎居托呼瑪克益

窮蹙八月嗾其黨金山馬良會等假貿易取俄官路票分起



繞俄卡行十三日犯烏什邊前隊驟入阿克蘇西北柯爾品  
一日掠數臺站劉錦棠先以軍東扼瑪喇爾巴什各隘而遣  
羅長祜率數百騎疾出喀城邊境要其歸路九月甲寅羅長  
祜至阿爾圖什偵寇已過索封口一日夜兼行四百里至冲  
殼罕及之設伏擒金山捕其黨二百餘人悉斬之其至烏什  
阿依他溝者亦爲張曜軍所殲甫定而阿克蘇西南二百里  
尹阿瓦堤回民托胡達買提倡眾數百人戕稅局員弁張曜  
遣武朝聘率所領馳勦擒其酋追至渾巴什眾悉破散同時  
前竄俄境夷酋阿里達什復由俄境窩什乞假潛出率其黨  
百餘人竄至英吉沙爾卡倫外奈曼糾布魯特頭目阿布都

勒哈瑪煽種人謀襲喀什噶爾十月辛卯越玉都巴什卡倫入烏帕爾擁立迭拉什罕爲條勒條勒者回部所稱教祖之裔也劉錦棠聞警卽夜率譚慎典楊金龍等馬軍千人先進羅長祐侯名貴等步軍繼之而令張俊出英吉沙爾卡倫覘達什密克里壬辰馬步軍至烏帕爾寇眾八百人返走玉都巴什列陳相拒官軍譟呼乘之殺三百餘人阿布都勒哈瑪逾山遁阿里達什率殘眾走還奈曼則劉錦棠已檄回目庫彌什率部眾四百人以待乙亥阿里達什竄至突起擒斬之悉殲斃其眾於時已

命吏部侍郎崇厚爲全權大臣使俄公奏言俄國邊官於新疆交

涉各案屢持異議爲緩還伊犁緩交叛逆之計此次藉貿易  
給白彥虎等路票入邊爲寇又任阿里達什告假潛出煽惑  
回民同襲喀什噶爾揆諸友邦睦誼應否如斯見在中國叛  
逆遁匿俄國者尙多似此紛紛竄擾防不勝防守邊將士將  
無解甲晏眠之日積忿久而心不甘臣實有難於禁約者應  
請

旨敕總理衙門照會駐京俄使知照備案可否請

旨敕下欽差全權大臣吏部侍郎崇厚一併入議之處并候

聖裁

上因密詢公新疆善後方略公謹條具以對曰竊臣於十月十三

日承准軍機大臣密寄光緒四年九月三十日欽奉

上諭一道跪聆之餘敬悉

皇太后

皇上保大定功慎終如始審時度勢策及萬全至意敢不畢獻其

愚仰俟

聖明采酌伏讀

諭旨伊犁在昔爲西路第一重鎮今爲俄人佔據形勢變遷交還以後如何防守尤應先事圖維伊犁九城縱橫相聯大城西南北三面舊有卡倫距俄境若干道路俄軍紮至何處金順見駐庫爾喀喇烏蘇前隊西至何處臣謹按俄人自佔據伊犁於西面舊有

拱宸瞻德廣仁塔勒奇四城均棄而弗守傾圯殆盡綏定一城近雜置陝回距伊犁三十里伊犁大城人煙甚少俄兵及商戶均萃居東面惠甯熙春甯遠三城而金頂寺煙戶尤多伊犁管事俄官名馬依爾品秩不過中國同知通判之類主伊犁之事者七河巡撫名喀爾帕科斯克依所駐阿爾瑪圖地屬俄境在伊犁西八百餘里其兼轄之官爲圖爾齊斯坦總督名克復滿自稱代國大臣駐浩罕故都塔什干城距我喀什噶爾不過數十程由喀什噶爾至俄邊納林河中隔俄屬布魯特部喀城馬行六日可至從前伊犁本不與俄境相連以哈薩克布魯特種人與浩罕所部安集延及布噶爾所

屬爲之隔閼近年俄人先後脅誘哈薩克布魯特種人又攻奪浩罕三部據其都城而浩罕屬安集延亦隨風而靡故我北路伊犁南路喀什噶爾邊境皆與俄屬相接距俄亦近也臣前疏所稱地不可棄者竊以腴地不可捐以資寇糧要地不可借以長敵勢非乘此兵威迅速圖之彼得志日驕將愈進愈偪而我饋運艱阻勢將自絀無地堪立軍府所憂不僅西北也伊犁收還以後應於邊境擇要築壘開濠安設大小墩位挑勁兵以增其險至伊犁大城西北之塔勒奇廣仁瞻德拱宸各城戶口鮮存水草卻便應各擇要隘暫駐各營分屯其間所有旂綠各營贖存兵丁各給牛種牲畜督令游牧

耕墾舊有城堡緩議修復尙非不可大城以東惠甯熙春甯  
遠各城民戶商戶願遷徙者遷徙願歸業者歸業邊圉旣奠  
人安其土耕其野而出其途者不待招徠迥非甘肅從前東  
路西路數百千里蒿萊滿望杳無人煙難於措置可比若烏  
魯木齊所屬各城相距甚遠難於照料此伊犁收還以後情  
形也伊犁未還之前金順大軍駐庫爾喀喇烏蘇其西精河  
地方勢處要隘向駐馬隊以資扼截自福珠哩歸後金順未  
及派紮填防致被漢回侵掠金順旋派馬隊二百前往填防  
當可無虞由精河西行一日爲永濟湖再西數十里卽伊犁  
俄官所設之頭卡三日卽抵伊犁中間山徑五道可達伊犁

不由惠甯熙春甯遠三城經過然巖谷幽邃僅容一人一騎行走不能通車若收還伊犁則驛道山徑皆成腹地此形勢變遷俄人見在布置官軍防守及距伊犁道里遠近大略也諭旨郡縣之制以民爲本見由嘉峪關烏魯木齊至庫爾喀喇烏蘇迤西商戶回民各存若干由吐魯番至南八城纏頭回共存若干除舊有各廳州縣外其餘各城改設行省究竟合宜與否倘置州縣有無可治之民不設行省此外有無良策臣謹按新疆之變起於北路迪化失守所屬相繼淪陷戶口傷亡最多漢民被禍尤酷以逆回仇視漢民故也比大軍進剿連拔堅城而昌吉呼圖壁綏來回民又因畏剿逃奔南路煙戶頓減克復以



來還定安集招徠開墾戶口漸增迪化州各屬尤成效可觀  
舊額民戶共四千二百有奇見報承墾者已三千六百餘戶  
昌吉縣民戶舊共三千九百有奇見報承墾者僅四百數十  
戶阜康縣民戶舊有三千九十餘見報承墾者僅二百一十  
餘戶綏來縣民戶舊有三千七百餘見報承墾者八百五十  
餘戶奇臺縣舊有民戶四千三百六十有奇見報承墾者五  
百七十餘戶濟木薩縣丞所屬舊有民戶二千八百有奇見  
報承墾者三百五十餘戶呼圖壁巡檢所屬舊有民戶一千  
七百三十有奇見報承墾者二百八十餘戶庫爾喀喇烏蘇  
舊有民戶僅八十有奇見報承墾者尙數十戶精河舊有民

戶四十有奇見報承墾者一百餘戶鎮西廳戶口無考舊種地六萬畝見報民墾三萬六千餘畝兵墾四千餘畝土客漸增此北路民戶見存實數也久罹兵燹戶口彫耗無怪其然鎮迪一道所屬雖子黎僅存頻年散給耕牛種籽酌發賑糧廣示招徠自木壘河抵精河除戈壁外又均是腴區土客民人及遣散勇丁領地耕墾逐漸增加署鎮迪道周崇傳勤慎廉幹事必躬親漸有明效需之時日百堵皆興卽以目前論之亦非無可治之民也吐魯番舊隸鎮迪道荒地尙少見委道員雷聲遠署同知奎紱妥爲撫輯糧石租稅已逾舊額之半南八城除英吉沙爾壤地褊小烏什土性瘠薄餘均較吐

魯番爲饒而喀什噶爾和闐葉爾羌阿克蘇庶而兼富物產  
豐盈又較各城爲盛劉錦棠張曜悉心經理見委員開河引  
渠清丈地畝修築城堡塘站鑄錢徵釐百廢肇興具有端緒  
較之北路尤易爲功是南北開設行省天時人事均有可乘  
之機失今不圖未免可惜此新疆之應改省者一也北路得  
之準部南路得之回部皆因俗施治未能與內地一道同風  
久已概爲邊地伊犁設將軍又設參贊大臣一員烏魯木齊  
設都統塔爾巴哈臺葉爾羌均設辦事大臣伊犁等處設領  
隊大臣五員塔爾巴哈臺烏魯木齊庫爾喀喇烏蘇古城巴  
里坤吐魯番烏什英吉沙爾均設領隊大臣哈密設辦事大

臣一員協辦大臣一員葉爾羌設兼管和闡事務協辦大臣一員烏什設幫辦大臣一員喀什噶爾設換防總兵一員是邊地腹地皆一律視之無甚區別與經野馭邊之義不符將軍都統與參贊辦事大臣協辦與領隊大臣職分等夷或皆出自

禁闥或久握兵符民隱未能周知吏事素少歷練一旦持節臨邊各不相下稽查督責有所難行地周二萬里治兵之官多治民之官少而望政教旁敷遠民被澤不亦難哉北路糧員但管徵收而承催則責之頭目南路徵收均由回目阿奇木伯克等交官官民隔絕民之畏官不如其畏所管頭目官之不

肖者狎玩其民輒以大羊視之凡有徵索頭目人等輒以官意傳取倚勢作威民知怨官不知怨所管頭目也內地徵收常制地丁合而爲一按畝出賦故無無賦之地亦無無地之賦新疆則按丁索賦富戶丁少賦役或輕貧戶丁多賦役反重事理失平莫甚於此貨幣之制子母不能相權爭訟之事曲直不能徑達官與民語言不通文字不曉全恃通事居間傳述顛倒混淆時所不免此非官與民新漸通其情實去其壅蔽廣置義塾先教以漢文俾其略識字義徵收所用券票其戶民數目漢文居中旁行兼注同字令戶民易曉遇有舛誤卽予隨時更正責成各廳州縣而道府察之則綱目具而

事易舉頭目人等之權殺官司之令行民之情僞易知政事之修廢易見長治久安之效實基於此此新疆之應改行省者二也夫立國有疆古今通義傳曰天子有道守在四夷周秦以前姑弗具論自漢以來通道始於張騫不能得月氏要領求馬繼以廣利不能下小國堅城漢於西域窮天下之力以務之卒有輪臺之悔故班固以爲得之無益棄之不爲損也今主棄地之說者祖之臣愚非不謂然顧斷斷於兵不可停地不可棄者蓋以地勢無今昔之殊而建置則有因創之異窮變通久因時制宜事固有不合已者謹按新疆開拓肇自

高宗時，迄涼州、西安、熱河、滿兵、延安、綏德、甯夏、興安、漢中、西南、固原、肅州、河州、安西、綠營兵丁駐守南北兩路，餉不外增各城養廉經費，則以京口、杭州等處出旂漢軍俸餉、口糧、馬乾及甘肅等處所減草料充之。計內地每歲節省之數共一百二十九萬兩有奇，而劃抵新疆養廉經費一百零七萬八千四百餘兩外，尙餘銀二十一萬一千五百餘兩，不特無糜餉之虞，且有節餉之實。論者竊以耗中事西疑之於

聖意拓邊節餉固無當也。臣自度隴以來，卽畱心稽考甘肅、新疆餉數，僉稱承平時每歲約銀五百餘萬兩。自變亂以來，冊籍散佚，難以覆按。請部鈔示成案，亦無以應。近據藩司崇保詳

稱查得道光二十七年甘肅口內外駐防滿州蒙古旂綠官兵應需俸餉紅白賞卹等項銀四百一十五萬二千三百五十三兩三錢九分九釐四絲一忽內先一年預撥銀一百四十萬兩外銀二百七十五萬二千三百五十三兩三錢九分九釐四絲一忽由部臣照依估撥預撥完數以此準之甘肅新疆實餉五百餘萬之數雖無可考而一歲之中預撥正撥四百一十五萬有奇則有數可稽也臣竊度南北兩路如行清丈之法就畝徵賦仿什一之制而從寬定額民收十數分官徵其一以給軍食尙可有餘修渠導流以備旱潦改鑄制錢以便民用設局徵釐以裕課稅剏設義塾教之識字選調



匠師教之藝事自季春至今次第經理甫有端緒容俟各處函贖取齊卽行具奏此外南北兩路物產尙有藥材皮張吐魯番之棉花和闐之玉庫車之金銅鉛鐵均應設籌及之是新疆利源非無可開也甘肅地處邊陲土曠人稀瘠苦甲於天下承平時錢糧徵收不及東南一大郡此其明徵亂後子黎皮骨僅存氣息僅屬雖頻年拊循休養漸有起色究之致力多而成功少者時地實有以限之通省舊設額兵太多全恃各省協款接濟自中原軍興各省未能兼顧於是同禍起新疆淪陷甘肅全省名雖僅存實則亡矣幸值

聖明在上洞燭無遺迨東南之餘財救西北之奇厄親賢夾輔內

外一心先關內而後關外次第圖之迺有今日不可謂非幸也此時所當亟籌者善後之策善後之策當規久遠利鈍所繫匪僅一時以甘肅與新疆并論新疆利源可開流亦可節甘肅則開源爲難而節流尙有可議從前額兵之多者一則轄疆與蒙部回番雜處兵少恐啟戎心一則新疆需由內地撥兵換防兵少難敷調派也若以見在局勢而言蒙部回番已就鈐束防營可以漸減前奏改行餉爲坐餉圖節勇餉爲復甘肅制兵之漸新疆南北如置行省換防之制可以永停又擬節制兵之餉以紓各省協款之力竊計甘肅新疆承平時預撥估撥餉銀四百數十萬兩俟伊犁收還每歲約可節

省百數十萬兩後此利源日增餉更可減部臣可隨時察酌而任甘肅新疆之事者可隨時陳奏特恐非微臣所見及耳此統籌甘肅新疆節省餉需以規久遠之大略也

諭旨宜於萬難措施之中求一可進可退之計臣愚竊以爲新疆歲需餉銀二百數十萬兩甘肅歲需餉銀二百數十萬兩本是承平時部臣預撥估撥常例茲當全隴澄清西域收復之時照常指撥於部章并無不合承撥各省當亦無詞況承平時應撥數目內又可節省百餘萬兩此後經理得宜節省或尙不止此實於

國家經出之費不無小補當亦部臣與疆圻諸臣所樂聞也臣

於新疆擬辦各事皆以利民裕

國爲主行省之改與否尙未奏奉

明旨而所籌者無論改省與否兩不相妨可行則行可止則止進退尙屬綽然過蒙

聖明矜諒示以轉圜之機若不披瀝直陳上紆

慈念更何以自處至愚衷有未盡者不得不及時陳明仰祈

垂察臣軍積欠之餉本八百餘萬兩頻年陸續清釐截至光緒四年尙欠一百數十萬兩近因飭道員胡光墉息借商款遲遲未到劉典向蘭州票號借銀四萬兩又飭後路糧臺道員王加敏息借漢商銀四十萬兩駐陝軍需局陝安道沈應奎息

借票號銀二十萬兩暫應急需台之關內外新欠餉項及遣撤勇餉又積至二百數十萬兩將來胡光墉解到息借鉅款除還陝鄂息借各款點綴新舊欠餉外所餘無幾縱極力劃畱以備光緒五年應用之需夏末秋初又將告罄前奉

諭旨嗣後無論何項急需不得動輒息借商款致貽後累敢不懷遵惟念甘肅新疆軍務臣既未嘗割款請餉而一切經費又未嘗另款請銷如果此次借用商款外各省協餉均能源源接濟臣猶可通挪展轉以期兼顧更何敢動輒息借商款干瀆

宸聰無論各省疆臣身在事外但見西事速了此後需用或可稍

紆而頻年悉索以供未免因煩生厭頻催罔應本屬人情之常而臣則勢逼處此莫展一籌將有束手待斃之日矣可否仰懇

天恩敕下軍機大臣六部九卿公同集議將甘肅新疆從前每年預撥估撥的餉四百數十萬兩指省解濟臣軍并於見協臣軍稍優各省酌撥解濟共足成五百萬兩之數以三年爲期臣得於三年內盡心經理斟酌損益定爲永圖三年以後甘肅新疆軍務既戡所擬開源節流之策亦必有成效可睹庶以前協款爲甘肅新疆用兵收復善後之需以後部撥爲甘肅新疆常例應有之款每年以三百數十萬兩爲度自無不

可臣本菲材疊荷

三朝恩遇忝竊至今當茲時艱孔亟非不思仰體

朝廷憂勤惕厲之懷稍慰各省關煩施不倦之意顧始謀未預晚  
益爲難所遇多艱綢繆鮮補雖有生之日皆報

國之年而年近七旬神識衰鈍欽承

密諭實切悚惶謹據實以陳

上下廷臣集議十一月奏卹前伊犁從事永謙等十三人十二月  
土爾扈特眾先後自伊犁歸喀喇沙爾者七千餘人公飭發  
給賑糧仍令於珠爾都斯游牧是月劉果敏公典卒於蘭州  
是年作重刊吾學錄序送劉克庵南歸序劉果敏公諫詞蒙

婦賀氏壙志秋日泛舟泉湖五古一首

光緒五年己卯公六十八歲

正月奏卹前西四城外事奎棟以下九十五人阿布都勒哈瑪敗竄俄境與其子買賣提斯拉木復結安集延條勒愛克木汗阿希木汗和卓咬買提謀內犯詭言沿邊欲爲帕夏報復眾已數萬愛克木汗等令各胖色提集夷兵八百餘人抵烏魯克恰提齊布魯特部眾千七百人東行三百四十里越卡浪圭窺明要路距喀城百里偵知有備折南趨博斯塘勒克其地爲布魯特比所居左右阻山中爲廣谷出谷口東南行六十里爲烏魯阿提正東行百六十里爲烏帕爾稍南爲



玉都巴什內卡地皆戈壁由博斯塘特勒克西北行二百里爲阿依阿提再西二百里爲卡拉阿爾提又百八十里踰黑子里達坡卽俄境劉錦棠以越戈壁進攻地平衍賊易爲備思俟寇至設伏山谷擊之丁未令方友升譚慎典率所部出駐烏帕爾而陰縱布魯特人投賊中誘其深入辛亥方友升報寇騎已掠烏帕拉特邊劉錦棠畱袁珪齡督侯名貴杜錫斌守滿漢城遣張俊率千人由英吉沙爾取道塔什密克里扼烏魯阿提董福祥率千人取道卡浪圭趨烏魯克恰提癸丑自率羅長祐各軍進烏帕爾偵寇將以夜來襲營部各軍爲左右伏以待而遣羅長祐率譚慎典方友升楊金龍張春

發馬步千八百人取間道銜枚徑擣博斯塘特勒克寇屯天  
甫明寇果大至劉必勝何倭兩道出拒寇爲圓陳外嚮敵下  
如雨何倭被槍中腦戰益力劉錦棠縱伏兵盡起寇錯愕卻  
走追擊三十餘里寇殞者百餘人方寇之來襲營也羅長祐  
亦至博斯塘特勒克抵谷口寇迺驚覺覺軍械起禦官軍驟  
入乘之斃寇五百餘人日晡望正東塵起偵者報寇大隊自  
烏帕爾折回迺列馬隊於外而悉伏步軍谷中寇瞥見官軍  
阻其前分騎爲數十隊如風雨驟至譚慎典挺長矛穿入其  
陳縱橫擊刺斃買賣提斯拉木寇大亂於是楊金龍方友升  
兩道鈔出殺三百餘人截寇軍爲二返奔入谷者可千騎步

軍將張春發湯彥和等挺刃以待寇至槍矛併舉連斬咬買  
提阿希木汗蹙餘眾悉殲之其前竄之寇繞由谷外先奔譚  
慎典等一日夜追二百里至阿依阿提道斬騎賊三百餘丙  
辰進至卡拉阿爾提布魯特探騎言愛克木汗與阿布都勒  
哈瑪率殘眾百騎已過黑子里達坂入俄境迺整軍而還於  
時日本阻琉球入貢且議改其國爲郡縣

廷議多主用兵總理衙門密以諮公公以琉球蕞爾微區歸附

中國與改隸日本無足輕重惟當慎固封守戒備不虞通據

在閩聞見以對

書牘卷二十二是年復總理衙門書云承示

日本阻貢一事辯論經年彼且議改琉球爲郡縣派使臣穴戶棧前來飭併陳所見宗棠在閩於兩國情形當討論及之琉球素弱土產亦遠遜日本其地必日本之

女常爲甥舅之國甘受其制福州南臺舊有琉球館貨物多由日本轉販而來其入貢爲通市計雖事中國惟謹而不敢開罪日本以島嶼相連地勢迫切故也新王立必渡海請封一則藉威靈以圖鎮壓一則相傳立王不請封則災異鮮生故請封一次費二十萬兩之多不惜所入賦稅無多不得不息貸日本日本必先取其所領詔敕爲質其貧弱亦因乎北同治五年宗棠目見琉球請封事官紳僉言琉球越南例有粵閩人充正副使其差囊專恃派銷私貨越南所得不知其詳琉球則勒派甚鉅供億頻縣內地無從過問也此事爲日本所知近來舉國以聽西人其思兼供以廣疆域亦在意中然蕞爾微區卽取而郡縣之亦非饜足之道矣戶機來意雖未可知然琉球歸附中國與改隸日本似無足輕重如藉請封一事爲阻貢話柄似可置之不論來不拒而往不追未嘗非息事甯人之一道惟閩浙之防不可少弛慎固封守戒備不虞固有不客已者禦侮必用兵用兵必擇三月俄屬哈

薩克布魯特部眾千餘人以俄賦斂重自伊犁投入喀喇沙

爾土爾扈特故地游牧諭之不去公令其借地以居於是分

飭南北兩路清丈地畝定丁糧釐稅則約以次釐定關內外

兵制

書廣卷二十二是年與楊石泉書云見催南北兩路速

便可得其大略若夫隨宜變通從而潤色固新疆督撫之事  
非衰朽所敢預擬耳甘肅兵制不分邊腹歷代因之專賴協  
款爲之接濟一旦中原多故自顧不遑隴干生機遂絕愚意  
不能足食必先去兵關外經理得宜劃清邊腹關內只河湟  
岷嶓爲邊甘涼安肅皆成腹地則制兵可減換防一事既議  
永停喀什噶爾之布魯特塔爾巴哈臺之蒙兵伊犁之錫伯  
南北兩路之土著皆可參募烏魯木齊之皖北一軍有不願  
回籍者亦可收令入伍其始仍畱客軍若干爲之鎮壓嗣則  
本藉增兵著伍而客軍可撤惟千把至副將必挑客軍之久  
經戰陳者充之定章外先畱客軍數年俟本地訓練有成再  
議裁撤庶額兵一律精強額設馬步邊重於腹重修堡障以  
重其險固數百年之利也關內土曠人稀回番雜處兵力  
固宜厚集然雍涼素稱勁兵處又皆產馬汰充雜而挑精壯  
兵可得而精就水草而選良駿馬可得而練兵制以十成之  
七爲步兵其三爲馬兵馬隊另立營起不與步兵相雜口糧  
較步從優馬乾草束徵之民間卽以抵餉餉可得而節額數

雖減即以所減之餉增給操練之軍所需各省協濟漸可減少前疏所稱三年五百萬以後每年三百數十萬尙是從寬籌算是月疏具夏忻王柏心吳士邁吳觀禮事蹟請宣付史館

許之先是新疆平後俄人數至邊境通商公以叛黨方屢由俄境入犯奏請未交伊犁以前應禁斷俄人通市至是侍郎崇厚至俄議還伊犁俄人以通商分界償款三端相持而先請沿邊弛禁通商崇厚以聞

朝議以俄雖允還伊犁而所議通商地方甚廣界務復圖侵佔償款之數亦未明言若遽行弛禁必又多所要求

詔崇厚力持定見不可急於索還伊犁轉貽後患而

下其書於公令與伊犁將軍金順等博議公奏曰竊維伊犁本我舊土適中原多故遠略未遑猝致淪陷俄人伺釁而動藉詞代爲收復入踞要區亦知所爲本冒不韙佯言俟官軍克復烏魯木齊瑪納斯卽交還伊犁更無異說迨

天戈西指迅克烏魯木齊瑪納斯而俄踞伊犁自若也官軍踰嶺而南拔吐魯番連下八城安集延逆酋旣伏其辜逆豎與陝甘敗殘逆賊渠目白彥虎等竄入俄境俄官納之屢索不與而踞伊犁自若冬春之交竄俄諸逆領取俄邊貿易路票三次窺邊爲官軍搜獲俄官諉爲不知而踞伊犁自若

朝廷重念邦交

特命崇厚出使以修約而敦睦誼於交還伊犁外并議及界務與商務夫伊犁應還不待今日且俄人舊議也今遲之又久始踐前諾其未足市德於我也明矣以界務論同治三年明誼與俄官定議準之舊界有縮無贏此次卽仿旤脫往事視爲隙地彼此同之在我仍有所損在彼亦受其益以商務論除邊界舊約無庸更議外布策從前在京師雖頗以嘉峪關爲意總理衙門未嘗輕許自不得卽據爲定論此次崇厚議允其設立領事已過所望凡此皆不待煩言而決者崇厚以全權出使仰體

皇仁商務界務外更有議及償款之請彼卽利我土地我復許以



重酬於義雖似未協然漢文之待北匈奴大單于也詔書而外優以繒帛詞意斐亶故事可循猶之可也

皇仁俯允所請惟於商務慮其流弊滋多界務慮其再圖侵佔敕崇厚堅持定見崇厚欽遵

諭旨與俄之外部諸臣從長計議理足而將之以誠我陸鄰之誼盡而又盡彼饜足之道加無可加若界務於同治三年定議外再許侵佔商務於嘉峪關內再允推廣則有關

國家疆圉華民生計者甚大在拮据戎馬機會迫促時猶未可輕議及此矧值

天威遠被遐邇震懾何爲必出此下策以苟且目前竊恐俄人識

時務者。或疑過情之許爲不誠。其無知者。翻疑我情實之兩  
訛。有爲而爲之。論端日出。應接不暇。固無論牯糠及米。異時  
防不勝防。必將於大局有誤也。臣愚竊謂伊犁塔爾巴哈臺  
一帶舊界已難復按。則仍以同治三年所定之界爲定。而以  
舊界作爲甌脫隙地。俄人或有在隙地內造屋居住。一時難  
於遷徙者。亦姑聽之。但定爲甌脫隙地。禁其日後修造可也。  
所有哈薩克各部落之舊屬中國新附俄國者。一併劃明界  
址。毋俾混雜。其喀什噶爾英吉沙爾一帶舊設卡倫爲逆酋  
阿古柏所毀。逆於相距二百里內外。改設卡倫。查本安集延  
故地。此次用兵追賊所得。因逆舊卡於此地。雖在舊界之外。

與俄無涉不在議內此界務大略也至商務已允其嘉峪關設領事通商其由俄邊而來入中國境如古城巴里坤哈密安西玉門等處地方皆其必出之途由古城經過者有官有驛足資照料惟旁境可通車駝者尙多應分設塘汛客棧核察辦理嘉峪關城地極褊狹俄設領事於此勢多不便或於肅州城內外度地居之相距僅六十里亦易照料由官置地建造租賃俄官居住按月薄取佃值并無不合俄之官商不得私向民間購基造屋致滋論端此商務大略也至由肅州高臺經甘涼兩郡以達蘭州省會由蘭州省會以達漢中或由東路達陝西省會由西安以達漢中而均指漢口爲銷貨

置貨之地由俄邊至漢口水陸萬里而遙歷新疆甘肅陝西  
河南湖北轄境陸程居其大半至龍駒寨荆紫關各處始有  
小船可雇餘皆車駝曳負以行道途修阻途徑錯雜俄商零  
星裝運防護難周時有疏失之慮如其聯幫行走尖站過載  
主客相參易滋口舌俄商性情高傲計較最工內地無賴之  
徒從而簸弄事事倚藉外人聲勢構釁生端官司不能譏禁  
偶有抵觸輒干吏議各省大吏相距太遠聲息難通事關中  
外交涉咨行察辦往復需時兩造各執一詞難於究詰案懸  
莫結動經數年督責既有時而窮調停復無計可設而疏漏  
冒混獄市多擾姑不具論此患之中於官者也甘肅地瘠民

食向不知經商服賈之利土物行銷外省者於葉藥材而外別無大宗民間所用車輛多係無鐵高輪牛馬駕曳負重而不能行遠馱貨用驢於農隙受雇運貨以供餵養而資其餘利陝西駕車多用騾馬惟馱用騾騾產自河南嵩洛間非陝所出陝民以車馱爲業者購騾於豫攬載通行百貨藉以運銷公私均取給於此軍興日久牲畜疲乏倒斃爲數既多加以陝豫游饑民間因餒養缺乏宰食充腹者不少於是車馱之價頓增百貨轉運因之而滯民間以私蓄車馱牛驢於農隙短運取值以資過度若允俄商入內銷貨置貨則車馱雇價益昂民間短運將廢生機頓塞殊非所宜此患之中於農

者也商貨行銷茶爲大宗茶之所產以楚爲盛甘肅舊有茶  
商行銷之茶設有官引從前私茶充斥官引不行軍興以來  
官商以喪流亡茶務倒歇臣不得已奏請改引爲票招販承  
銷裁革陋規聽民自便於是茶販踵至迨官軍復地漸廣可  
冀暢銷而私茶又由山西包頭藉行銷蒙古繞道草地侵銷  
新疆北路間有倒灌南疆者臣飭古城巴里坤印委各員實  
力查禁而偷越仍難杜絕惟南疆吐魯番八城纏回見博茶  
則喜謂卽承平時湖茶非私販筒于茶可比惟地方新復銷  
數尙未能暢計官茶屯滯各處者尙百餘萬斤非一兩年不  
能銷盡而票販成本息耗愈久則虧累愈鉅正思減價出售

以清夙累若允俄商入內地置貨勢必侵佔官茶引地票販虧累無從取償此患之中於商者也。經商之事必先計成本所謂成本者合貨價運腳盤攪三者估之攤入貨色爲成本再計市值之高低爲利息之贏縮大抵皆然。泰西各國之通商者均由海道入長江抵漢口雖遠逾數萬里而皆一水可通貨價雖同而運腳較陸程減少不止十倍。洋商初入長江見漢口爲百貨匯萃埠頭爭於其地購地修造洋行又於漢口下游江西之九江購地如式修造洋行卽成傑構臨江自誇得計迺不數年生計蕭條得不償失并兩處洋行覓主求售亦不可得水路經商尙如此之艱也。茲俄商不顧崎嶇萬

里欲與海國競此貿易之利前車既覆後轍方遑加以陸運腳價行棧盤攷合計成本較各國商人奚翅十倍過之縱使善於營運折閱固在意中雖彼自失算於我無尤然折閱必不甘心又將顧而之他爲求贏之計於是而電綫鐵路諸事議論紛紜殆有應接不暇者斯時偶與通融異日卽添無數煩惱再圖補救悔之已遲此患之中於

國計者也臣愚再四籌維俄商若由嘉峪關歷甘肅陝西河南湖北而抵漢口銷貨置貨彼此實無利益徒多擾累非賴使臣欽遵

諭旨堅持定見剴切言之俾決計阻止不可至洋藥流毒日久必



思所以禁之論其辦法次第必自內地禁種罌粟始內地不產菸則其價必昂價昂則吸之者少然後禁令可張始有更新之望甘省遵

旨禁種罌粟著有成效上年曾經奏明見復據司道詳稱先後據府廳州縣稟報印委各員躬親巡歷不憚勞苦民間奉令惟謹實已根株淨絕惟懇出示曉諭禁止外來土菸如有川滇客民販土入境者當眾焚燒薄與責懲令其改圖貿易奸販亦漸知畏懼臣擬俟覆核確實再行具奏茲閱崇厚商改章程第十五款於洋藥定議稍寬其禁準在口銷賣殊與甘肅見行章程不合若照所議不特無以慰此邦官紳士民望治

之心亦無以杜川滇商販之口崇厚未悉見時甘肅辦法故有此議可否仰懇

皇上天恩諭將洋藥一項芟除定議伏候

聖裁又言俄人近時目覩劉錦棠勲望日盛不免因畏憚而生忌嫉動輒造謠傳播妄思搖撼古云盜憎主人固無足怪惟威名日久疑謗易滋無以塞遠人之膽又飛鳥未盡良弓已藏足隳任事之氣區區愚忱不敢不盡伏懇

天恩併案論功將劉錦棠

優賞欽差銜

敕令幫辦新疆軍務以彰

殊眷而資鎮壓七月愛克木汗與阿布都勒哈瑪復糾眾至烏魯克恰提西南竄至葉爾羌邊色勒庫爾劉錦棠遣劉必勝夏辛酉屯烏帕爾庚午自率馬步二千餘人由喀城裏二十日糧向色勒庫爾於時寇已圍攻色勒庫爾伯克素唐夏憑城堅守阿布都勒哈瑪數遣人誘降伯克素唐夏徯許之約至城下定議而預選壯士二十餘人出城與阿布都勒哈瑪相見玉子巴什蘇通滿遽前引其馬韁阿布都勒哈瑪驚覺拔刀斷蘇通滿指返奔壯士名豁罕者發槍洞中其背舛并斃其從騎七人寇忿甚攻城益急劉錦棠聞報改由山路兼程進八月乙巳至秦爾里偵寇聞大軍至解圍北竄庫倫可相

距已踰四站於是令董福祥督軍躡追自護輜重繼進戊申  
追至空谷根滿斯見牛馬血盈地知寇蹤不遠而步軍日久  
奔驟足皆重繭迺選精卒乘隊驟隨馬軍令張俊率以先進  
晡後及之木吉寇方解鞍秣馬見官軍至驚起依山而陳張  
俊分軍三路進擊戰逾時一酋執紅旂掠陳軍士突前斬之  
寇失勢卻走二里許復折回力鬪軍士益鼓勇前擊而分隊  
遮其去路寇遁大潰進至卡拉阿提已昏暮迺收隊爲營四  
鼓復整隊猛追日午及之寇不復能反拒槍矛所至屍相填  
藉庚戌抵黑子拉提達坂寇餘數十騎踰山入俄境迺止不  
追董福祥軍繼至木吉放兵搜寇逸在山谷間者復斬三百

餘騎是役四晝夜馳八百餘里所至皆荒曠阻絕人迹罕到之地石壁冰梯陡入霄漢士馬皆蹂躪而升俯瞰幽壑渺冥不見其底觸煙瘴中疾墜崖而斃者甚眾凡擒斬安集延大通哈二人胖色提以下數十人斃寇二千數百名獲馬牛數千頭自此之後寇迺不復犯邊是月崇厚遽依前議與俄人定約畫押奏入

上怒其輕率一時朝論大譴爭上書論劾公前疏甫入復詔公詳議公覆陳曰臣於九月初九日欽奉八月二十三日  
上諭總理各國事務衙門奏籌辦交收伊犁事宜請敕疆臣覈議一摺據稱連接崇厚電報內稱約章見皆定議崇厚於八月初八

日起身赴黑海畫押後即回京覆命并將見議條約十八款摘要知照詳加覆核償費一節尙不過多通商則事多轉轉分界則弊難枚舉亟宜籌畫布置迅圖補救各等語崇厚出使俄國固以索還伊犁爲重而界務商務關係國家大局者自應熟思審處計出萬全且疊經總理各國事務衙門電致崇厚若照來函有礙大局節略內并言所損已多斷不可行該大臣尤應遵照辦理設法與之辯論迺竟任其要求輕率定議殊不可解見在俄約既輕議定其第七款所稱中國接收伊犁後陬爾果斯河西及伊犁山南之帖克斯河歸俄屬第八款所稱塔城界址擬稍改是照同治三年議定之界又於西境南境劃去地段不少從此伊犁勢成孤立控

守彌難況山南劃去之地內有通南八城要路兩條關繫回疆全局尤非淺鮮至第十款於舊約喀什噶爾庫倫設領事官外增出嘉峪關烏里雅蘇臺科布多哈密吐魯番烏魯木齊古城七處亦欲酌設領事第十四款并有俄商運俄貨走張家口嘉峪關赴天津漢口過通州西安漢中運土貨回國同路之語不特口岸過多并與華商生計有礙自應設法挽回以維全局左宗棠於新疆情形瞭如指掌金順錫綸久在西北各路諳習邊情且西路通商應如何布置始能害少利多左宗棠必有權衡至張家口漢口係南北洋分轄地方所有通商諸務亦應彼此通籌著左宗棠金順錫綸將界務商務各條款悉心酌覈李鴻章沈葆楨素顧大局除商

務各條詳加籌畫外其界務如何辦理始臻周妥之處分別詳細密陳該衙門另片所陳界務尤關緊要就崇厚寄來分界圖說中國如尙可設法布置卽當妥爲辦理若必不可允則邊防尤宜及時籌辦各等語此事一出入關繫綦重左宗棠督辦軍務事權歸一尤當通籌全局權其利害輕重一併核議密速具奏原摺片均著鈔給閱看將此由六百里各密諭知之欽此同日欽奉八月

二十四日

上諭昨因總理各國事務衙門奏崇厚與俄國商辦交收伊犁事宜輕率定議畫押當經諭令左宗棠籌畫密奏本日據左宗棠奏覆陳邊務一摺所陳界務商務大略及妨民病國各條慮遠思深



洵屬老成之見特崇厚見已定議畫押事機已誤惟有亟籌補救設法挽回著左宗棠懍遵昨日諭旨將商務界務如何辦理始臻周妥之處或約章必不可允邊防一切如何布置始無患生肘腋之虞詳細籌度妥議具奏等因欽此跪誦之餘敬悉我

皇上軫念邊陲

勤求馭遠方略

聖謨廣運明照無遺曷勝欽服竊維

國家建中立極東南濱海西北以崑崙枝幹爲界畫向與俄羅斯不相聯接以蒙部哈薩克布魯特浩罕爲之遮蔽間隔也近自俄人日迫誘脅日眾哈薩克布魯特各部落多附俄人

俄又取浩罕三部落拓其邊圉於是俄與中國邊境毗連無復隔闕矣適中原兵事方殷未遑遠略俄人乘間佔據伊犁藉稱代我收復爲要素計并照其國法按竈科賦以充兵費亦稱饜足矣

朝廷重念邦交卽予以代我收復之名并允給償款盧布五百萬圓光緒三年西洋新聞紙載俄國議願得俄元二百五十萬交還伊犁海上傳播未必無因此次償款忽議增五百萬圓其挾詐相嘗已可概見至界務與商務兩者相因西北與東南事體各別道光中葉以後泰西各國船廠橫行海上闖入長江所爭者通商口岸非利吾土地也亦謂重洋迢遞彼以

客軍深入雖得其地終無全理戰則勢孤守則費鉅合從之勢既成獨據則誨爭分肥則利薄也中國削平髮捻兵力漸彊製礮造船已覩成效彼如思逞亦有戒心而渝約稱兵各國商賈先失貿易之利苟且相安無事其亦知難而息焉若夫俄與中國則陸地相連僅天山北幹爲之間隔哈薩克安集延布魯特大小部落從前與準回雜處者自俄踞伊犁漸趨而埒之俄已視爲已有若此後蠶食不已新疆全境將有日蹙百里之勢而秦隴燕晉邊防且將因之益急彼時徐議籌邊正恐勞費不可殫言大局已難覆按也夫陸路相接無界限可分不特異日無以制憑陵卽目前亦苦無結束不及

時整理坐視邊患日深殊爲非計俄人佔踞伊犁之始謂竢我克復烏魯木齊瑪納斯卽當交還比官軍連下各城并克復南疆而俄不踐前言穩踞如故方且庇匿叛逆縱其黨類肆出窺邊上冬今春陝回及布魯特汗安集延條勒入犯時官軍獲生賊訊供搜有俄官路票昨次布魯特安集延諸賊由俄境阿來地方出竄經官軍勦洗殆盡漏網數十人仍遁匿俄境據活賊口供亦由俄官驅遣所致四次縱賊犯邊官軍追賊均未越俄界一步我之守約如此彼之違約如此尙何信義可言當崇厚與俄官議交伊犁時俄人首以

恩赦爲請并以曉示難於偏及爲慮崇厚奏聞

諭旨敕臣照辦臣謹遵

旨并會同金順出示曉諭伊犁漢陝纏土各回民等宣布

皇恩以安反側金順卽派提督殷華廷肅示前赴伊犁張貼俄官  
七河巡撫忽變前議將殷華廷擋回不令貼示藉稱應候圖  
爾齊斯坦總督回信比金順二次遣殷華廷復往探詢七河  
巡撫竟派人阻之伊犁境外不準復入似此任意把持不獨  
違慢

朝旨并置其君與外部諸臣成議於不顧其悖謬又如此俄之佔  
踞伊犁也將大城西北三城廬舍墮爲平地迤東清水河塔  
爾奇綏定三城均毀棄以居漢回蘆草溝城盤子等處均棄

而不守而取各城堡木料於大城東南九十里金頂寺營造  
市廛幾二十里臣上年十月二十二日覆陳摺內已略言之  
茲據金順錫綸所言伊犁情形亦同察俄人用心殆欲踞伊  
犁爲外府爲佔地自廣藉以養兵之計久假不歸布置已有  
成局我索舊土俄取兵費鉅資於俄無損而有益我得伊犁  
只賸一片荒郊北境一二百里間皆俄屬部孤注萬里何以  
圖存況此次崇厚所議第七款接收伊犁後陬爾果斯河及  
伊犁山南之帖克斯河歸俄屬無論兩處地名中國圖說所  
無尙待詳考但就方向而言是劃伊犁西南之地歸俄也自  
此伊犁四面俄部環居官軍接收墮其度內固不能一朝居

耳雖得必失庸有倖乎武事不競之秋有割地求和者矣茲一矢未聞加遺迺遽議捐棄要地廢其所欲譬猶投犬以骨骨盡而噬仍不止目前之患既然異日之憂何極此可爲嘆息痛恨者矣金順錫綸之擬緩收伊犁而以沿邊喀什噶爾烏什精河塔爾巴哈臺四城宜足兵力濬餉源廣屯田堅城堡先實邊備自非無見惟伊犁見無定議謀新疆者非合南北兩路通籌不可見在伊犁界務未定則收還一節自可從緩計議喀什噶爾烏什規畫已周毋庸再議其塔爾巴哈臺精河急需加意綢繆應由金順錫綸自行陳奏請

旨外所有崇厚定議畫押十八款內償費一節業經奉有

諭旨第八款所稱塔城界址擬稍改照同治三年議定界址尙只  
電報應俟崇厚奏到再議第十款於舊約喀什噶爾庫倫設  
領事官外復議增設嘉峪關烏里雅蘇臺科布多哈密吐魯  
番烏魯木齊古城七處第十四款并有俄商運俄貨走張家  
口嘉峪關赴天津漢口過通州西安漢中運土貨回國均經  
總理衙門奏奉

諭旨指駁外第二款中國允卽

恩赦伊犁居民業經遵

旨照辦俄官截阻齎示委員不準張貼第三款伊犁民人遷居俄  
國入籍者準照俄人看待意在脅誘伊犁民人歸俄而以空



城貽我與截阻齎示委員同一用心第四款俄人在伊犁準照舊管業伊犁雖還中外商民雜處無界限可分何以自守至商務允其多設口岸不獨奪華商生計且恐蔓延日廣枝節橫生總理衙門原奏籌慮深遠實已纖細畢周

諭旨允行則實受其害應設法挽回以維全局竊維邦交之道論理而亦論勢本山川爲疆索界畫一定截然而不可踰彼此信義相持垂諸久遠者理也至爭城爭地不以玉帛而以興戎彼此疆弱之分則在勢而不在理所謂勢者合天時人事言之也非僅直爲壯而曲爲老也俄踞伊犁在咸豐十年同治三年定界之後舊附中國與中國民人雜處各部落被其

脅誘俄官卽視爲所屬藉以肆其憑陵俄之取浩罕三部也  
安集延未爲所併其酋阿古柏畏俄之偏裒其部眾陷我南  
疆我復南疆阿古柏外逆子竄入俄境俄迺認安集延爲其  
所屬欲藉爲侵佔回疆腴地之根見冒稱喀什噶爾住居之  
俄屬本隨帕夏而來安集延餘眾俄之無端冒爲已屬實與  
交還伊犁仍畱復踞地步同一居心觀其交還伊犁而仍索  
南境西境屬俄其詭謀豈僅在此數百里土地哉界務之必  
不可許者此也俄商志在貿易本無異圖俄官則欲藉此爲  
通西於中之計其蓄謀甚深就商務言之俄之初意只在嘉  
峪關一處此次通議及關內并議及秦蜀楚各處非不知運

腳繁重無利可圖蓋欲藉通商便其深入腹地縱橫自恣我  
無從禁制耳嘉峪關設領事容尙可行至喀什噶爾通商一  
節同治三年雖定約實辦迄未舉行此次界務未定姑從緩  
議而烏里雅蘇臺科布多哈密吐魯番烏魯木齊古城等處  
廣設領事欲因商務蔓延及地方斷不可許此商務之宜設法  
挽回者也此外俄人容納叛逆白彥虎一節崇厚曾否與之  
理論無從懸揣應俟其復

命時請

旨確詢以憑核議臣維俄人自佔據伊犁以來始以官軍勢弱欲  
誑榮全入伊犁陷之以爲質既見官軍勢彊難容久踞迺藉

詞各案未結以緩之此次崇厚全權出使噶布策先以巽詞  
餽之枝詞惑之復多方迫促以要之其意蓋以俄於中國未  
嘗肇起衅端可間執中國主戰者之口安忖中國近或厭兵  
未便卽與決裂以開邊釁而崇厚全權出使便宜行事又可  
牽制疆臣免生異議是臣今日所披瀝上陳者或尙不在俄  
人意料之中當此時事紛紜

主憂臣辱之時苟心知其危而復依違其間欺幽獨以負

朝廷使便安而誤大局臣具有天良豈宜出此就事勢次第而言  
先之以議論委婉而用機次決之以戰陳堅忍而求勝臣雖  
衰庸無似敢不勉旃除烏里雅蘇臺科布多邊務應請

旨敕下該將軍大臣預籌布置以臻妥慎外所有新疆南北兩路軍務臣卽身在事中自當與各將領敬慎圖維期於有濟俟明春解凍後親率駐肅親軍增調馬步各隊出屯哈密就南北兩路適中之地駐紮督飭諸軍妥慎辦理所有進止遲速機要應秘密者卽據所見函商總理衙門核酌務期內外一心堅不可撼維持大局仰副

宸謨

書牘卷二十三是年與沈吉田書云近日累疏復陳奚止萬言均取辦一手心泉涸竭至喀血較前轉甚然日間工課如常未形作輟計符到奉行爲期或遠崇使計已回京都人士

議論欲得而甘心實則非疆臣所宜言故弟疏於利害言之甚謬此段則不之及也已奉

上諭李鴻章奏稱議定約章各款耗損已多惟崇厚業經定議若

不允準恐因此啟釁惟有竭力挽回并於立法用人二者認真籌畫稍資補救等語著左宗棠一併妥議具奏公覆奏曰李鴻章持論名通如民人雜處則界務仍未分明口岸太多則辦理易生枝節兩語尤爲扼要臣之愚見於十月二十一日摺內已舉以入告伏望

聖慈於崇厚復命之日將所議各款下軍機大臣總理衙門六部九卿及將軍督撫臣會議孰駁孰準各本所見條舉以聞其所不知或知之不詳者則聽其闕焉俾得各抒其靖獻之忱以達其竭忠盡力之意又數月來欽奉

密諭又總理衙門各疏深切著明足令外人心折應宣示者亦予

宣示謨謀者天下之大公何庸秘密亦足令新聞小說不致  
淆惑視聽也又貽總理衙門書曰

諭旨頗以先允後翻曲仍在我爲疑愚見地山雖以全權出使而  
所議約章均須俟

御筆批准是先無所謂允也嗣奉

御批不得以後翻疑之但宜於地山復

命後將不可允各條

明旨宣示俾中外咸知

聖意所在則正氣常伸人心自奮以目前邊事言之論理固我所  
長論勢亦非我所短只內外堅持定議詢謀僉同欽奉

諭旨以與周旋則先之口舌繼以兵戎事無不濟如界務商務各  
大節目俄均降心相從此外自當示以包荒不與計較否則  
檄南路之師分由阿克蘇烏什兼程急進直取伊犁兼索叛  
逆集關內之勢塞其蹊徑令其就我範圍均有把握特衅端  
之開不先自我迺操全算於是以次調換防軍將漢中鎮總  
兵譚上連甯夏鎮總兵譚拔萃巴里坤總兵席大成記名提  
督戴宏勝分率關內新練各營先赴喀什噶爾益劉軍十二  
月崇厚至京

詔革職交刑部治罪所議各款

下閣部九卿翰詹科道集議 公自新疆平定迺遺書誠諸子曰



吾積世寒素近迺稱巨室雖屢申儆不可沾染世宦積習而  
家用日增已有不能撙節之勢我廉金不以肥家有餘輒隨  
手散去爾輩宜早自爲謀大約廉餘擬作五分以一爲爵田  
餘作四分均給爾輩每分不得過五千兩也爵田以授宗子  
襲爵者凡公用於此取之吾生平志在務本耕讀而外別無  
所尙三試禮部卽無意仕進時值危亂迺以戎幕起家厥後  
以不求聞達之人上動

天鑒建節錫封忝竊非分復以乙科入閣爲家世未有之殊榮  
國家特見之曠典此豈夢想所能到子孫能學吾之耕讀爲業  
務本爲懷吾心慰矣若必謂功名事業高官顯爵無忝迺祖

此豈可期必之事亦豈數見之事哉或且以科名爲門戶計  
爲利祿計則并耕讀務本之素志而忘之是謂不肖矣見家書  
是年於蘭州設織呢局雇用德國工匠仍令賴長總其成并  
購開河機器先施治於涇川上源 作長沙徐府君墓表一  
首